



ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

15.04.2013թ.

Ո Ր Ո Շ Ո Ւ Մ

ԳԲԽ-19/13 բողոքը քննող հանձնաժողով

ԳԲԽ-19/13 բողոքը քննող հանձնաժողովը՝ գործելով գնումների բողոքարկման խորհրդի անունից, քննելով «Արմիլիդայնպրոեկտ» ՍՊԸ-ի կողմից 25.03.2013թ. ներկայացված բողոքը, ինչպես նաև ուսումնասիրելով ԳԲԽ-19/13 բողոքի վերաբերյալ «Գնումների աջակցման կենտրոն» ՊՈԱԿ-ի կողմից ներկայացված եզրակացությունը պարզեց.

1. «Արմիլիդայնպրոեկտ» ՍՊԸ-ի կողմից ներկայացված փաստերը, հիմնավորումները և պահանջը.

«Գնումների աջակցման կենտրոն» ՊՈԱԿ-ին ներկայացված բողոքով «Արմիլիդայնպրոեկտ» ՍՊԸ-ն հայտնել է, որ «Արմիլիդայնպրոեկտ» ՍՊԸ-ն և «Մոնտաժտրանսչին» ՓԲԸ-ն կոնսորցիումով մասնակցել են ՀՀ քաղաքաշինության նախարարության «Քաղաքաշինական ծրագրերի իրականացման գրասենյակ» պետական հիմնարկի կողմից կազմակերպված «ՔՆՔԾԻԳ-ԲԸԱՇՁԲ-13/3» ծածկագրով բաց

ընթացակարգին, որի արդյունքում կազմակերպությունները ճանաչվել են ընթացակարգի 1-ին տեղը զբաղեցնող:

Գնումների մասին ՀՀ օրենսդրությամբ և «ՔՆՔԾԻԳ-ԲԸԱՇՁԲ-13/3» ծածկագրով բաց ընթացակարգի հրավերով սահմանված ժամկետներում Կազմակերպություններին առաջարկվել է 5 օրացուցային օրվա ընթացքում ներկայացնել որակավորման չափանիշներին համապատասխանությունը հիմնավորող փաստաթղթերը:

«Արմիլիդիզայնպրոտեկտ» ՍՊԸ-ի և «Մոնտաժտրանսշին» ՓԲԸ-ի կողմից սահմանված ժամկետներում ներկայացվել են նշված փաստաթղթերը, որի արդյունքում պարզվել է, որ որոշ փաստաթղթերում առկա են անհամապատասխանություններ և գնահատող հանձնաժողովն առաջարկել է 3 աշխատանքային օրվա ընթացքում շտկել ներկայացված որակավորման փաստաթղթերում տեղ գտած անհամապատասխանությունները:

Կազմակերպությունների կողմից հաջորդ օրը շտկվել և գնահատող հանձնաժողովին է ուղարկվել նշված փաստաթղթերը, որից հետո գնահատող հանձնաժողովն անհիմն կերպով մերժել է Կազմակերպությունների հայտը՝ պատճառաբանելով, որ բացակայում էր «Մոնտաժտրանսշին» ՓԲԸ-ի ֆինանսական միջոցների մասին հայտարարությանը /հրավերի հավելված 2.3/ կցվող փաստաթղթերը /վարկային գծի տրամադրման մասին բանկի կամ վարկային կազմակերպության հետ կնքված պայմանագիր կամ բանկի, վարկային կազմակերպության կամ ապահովագրական ընկերության կողմից տրված երաշխիք/, մինչդեռ «Մոնտաժտրանսշին» ՓԲԸ-ի կողմից ներկայացվել է նշված փաստաթուղթը:

Սակայն «Արմիլիդիզայնպրոտեկտ» ՍՊԸ-ն բանավոր կերպով տեղեկացել է, որ հանձնաժողովը հայտը մերժել է այն պատճառով, որ ներկայացված վարկային պայմանագիրը հանձնաժողովի կողմից չի համարվել պահանջվող վարկային գծի պայմանագիր:

«Արմիլիդիզայնպրոտեկտ» ՍՊԸ-ն գտնում է, որ «Արմիլիդիզայնպրոտեկտ» ՍՊԸ-ի և «Մոնտաժտրանսշին» ՓԲԸ-ի կողմից ներկայացված հայտը համապատասխանում է գնումների մասին ՀՀ օրենսդրությամբ և հրավերով սահմանված պահանջներին և գնահատող հանձնաժողովի կողմից Կազմակերպությունների կողմից ներկայացված հայտը մերժելն իրավաչափ չէ, քանի որ բանկի կողմից տրված տեղեկանքի համաձայն, ներկայացված վարկային պայմանագիրը (օվերդրաֆտը) համարվում է վարկային գիծ:

«Արմիլիդիզայնպրոտեկտ» ՍՊԸ-ն գտնում է, որ գնահատող հանձնաժողովի կողմից խախտվել են «Գնումների մասին» ՀՀ օրենքի 31-րդ հոդվածի 1-ին, 6-րդ մասերով և ՀՀ

կառավարության 10.02.2011թ. N 168-Ն որոշմամբ հաստատված կարգի 83-րդ կետով սահմանված պահանջները:

Հիմք ընդունելով վերոգրյալը՝ «Արմիլիդայնպրոտեկտ» ՍՊԸ-ն խնդրել է դադարեցնել «ՔՆՔԾԻԳ-ԲԸԱՇՁԲ-13/3» ծածկագրով բաց ընթացակարգի գնահատող հանձնաժողովի կողմից «Արմիլիդայնպրոտեկտ» ՍՊԸ-ի և «Մոնտաժտրանսշին» ՓԲԸ-ի հայտը մերժելու մասին որոշումը:

2. ՀՀ քաղաքաշինության նախարարության «Քաղաքաշինական ծրագրերի իրականացման գրասենյակ» ՊՀ-ի կողմից բողոքի վերաբերյալ ներկայացված փաստերը և հիմնավորումները.

«Գնումների աջակցման կենտրոն» ՊՈԱԿ-ը 04.04.2013թ. N 04/032-542 գրությամբ դիմել է ՀՀ քաղաքաշինության նախարարության «Քաղաքաշինական ծրագրերի իրականացման գրասենյակ» ՊՀ-ին՝ խնդրելով կարծիք տալ «Գնումների աջակցման կենտրոն» ՊՈԱԿ-ում 25.03.2013թ. «Արմիլիդայնպրոտեկտ» ՍՊԸ-ի կողմից ներկայացված բողոքի վերաբերյալ:

ՀՀ քաղաքաշինության նախարարության «Քաղաքաշինական ծրագրերի իրականացման գրասենյակ» ՊՀ-ն 13.04.2013թ. N ՀՍ/1-321-13 գրությամբ «Արմիլիդայնպրոտեկտ» ՍՊԸ-ի կողմից ներկայացված բողոքի վերաբերյալ հայտնել է հետևյալը.

ՀՀ քաղաքաշինության նախարարության «Քաղաքաշինական ծրագրերի իրականացման գրասենյակ» պետական հիմնարկի կողմից ՀՀ Արագածոտնի մարզի գ. Մաստարայի միջնակարգ դպրոցի (երկրորդ մասնաշենք) հիմնանորոգման աշխատանքների գնման նպատակով հայտարարված «ՔՆՔԾԻԳ-ԲԸԱՇՁԲ-13/3» ծածկագրով գնման բաց ընթացակարգին հայտ են ներկայացրել «Արմիլիդայնպրոտեկտ» ՍՊԸ-ն և «Մոնտաժտրանսշին» ՓԲԸ-ն համատեղ գործունեության կարգով (կոնսորցիումով): Գնահատող հանձնաժողովի որոշումով վերոհիշյալ կոնսորցիումը ճանաչվել է առաջին տեղ զբաղեցնող և համաձայն «Գնումների մասին» ՀՀ օրենքի, սահմանված ժամկետում Հանձնաժողովին է ներկայացրել իր՝ Հրավերով նախատեսված որակավորման չափանիշներին համապատասխանությունը հիմնավորող փաստաթղթերը:

Գնահատող հանձնաժողովի կողմից ներկայացված փաստաթղթերի գնահատման արդյունքում արձանագրվել են որոշակի անհամապատասխանություններ, ինչի մասին «Արմիլիդիզայնպրոեկտ» ՍՊԸ-ին և «Մոնտաժտրանսշին» ՓԲԸ-ին ներկայացվել է ծանուցում հետևյալ տեսքով.

«ՔՆՔԾԻԳ-ԲԸԱՇՁԲ-13/3» գնման գործընթացի հրավերով սահմանված որակավորման պահանջներին նրանց համապատասխանելու մասին ներկայացրած փաստաթղթերում գնման գործընթացի հրավերով սահմանված պահանջների նկատմամբ առկա են անհամապատասխանություններ մասնավորապես՝

1. Ամբողջական չեն նախկինում կատարած պայմանագրերի և աշխատանքների հանձնման-ընդունման արձանագրությունների փաստաթղթերի փաթեթը,

2. Բացակայում են «Մոնտաժտրանսշին» ՓԲԸ-ի ֆինանսական միջոցների առկայությունը հավաստող փաստաթղթերը, ինչպես նաև կնքվելիք պայմանագրի կատարման համար անհրաժեշտ աշխատանքային ռեսուրսների մասին հայտարարությունը՝ կցվող փաստաթղթերով, համատեղ գործունեության կարգով (կոնսորցիումով) մասնակիցներից յուրաքանչյուրի ստանձնած պարտավորությունների չափի մասին փաստաթղթերը:

3. Ներկայացված ոչ բոլոր փաստաթղթերն են ստորագրված և կնքված համատեղ գործունեության կարգով (կոնսորցիումով) հանդես եկող մասնակիցների կողմից:

Հիմք ընդունելով «Գնումների գործընթացի կազմակերպման մասին» կարգի 75-րդ կետի պահանջը՝ ՀՀ քաղաքաշինության նախարարության «Քաղաքաշինական ծրագրերի իրականացման գրասենյակ» ՊՀ-ն առաջարկում է «Արմիլիդիզայնպրոեկտ» ՍՊԸ-ին և «Մոնտաժտրանսշին» ՓԲԸ-ին նույն ծանուցումն ստանալուց երեք աշխատանքային օրվա ընթացքում շտկել վերոհիշյալ անհամապատասխանությունները:»:

Սահմանված ժամկետում վերոհիշյալ կոնսորցիումի կողմից գնահատող հանձնաժողովին ներկայացված փաստաթղթերով չեն ամբողջացվել նախկինում կատարած պայմանագրերի և աշխատանքների հանձնման-ընդունման արձանագրությունների փաստաթղթերի փաթեթը:

Որպես «Մոնտաժտրանսշին» ՓԲԸ-ի ֆինանսական միջոցների առկայությունը հավաստող փաստաթուղթ ներկայացվել է «Յունիբանկ» ՓԲԸ-ի և «Մոնտաժտրանսշին» ՓԲԸ-ի միջև կնքված Վարկային Պայմանագիր. ինչը գնահատող հանձնաժողովի կողմից չի ընդունվել որպես հրավերով պահանջվող վարկային գծի մասին պայմանագիր:

Գնահատող հանձնաժողովի կողմից հայտի ամբողջական գնահատման արդյունքում ներկայացված հայտը գնահատվել է «անբավարար» և մերժվել: Հանձնաժողովը փաստաթղթերը ներկայացնելու պահանջ է առաջադրել հաջորդ տեղը զբաղեցրած մասնակցին:

Հետագայում պարզվել է, որ ՀՀ քաղաքաշինության նախարարի 27.03.2013թ. N 95 հրամանով կասեցվել են «ՔՆՔԾԻԳ-ԲԸԱՇՁԲ-13/3» ծածկագրով հայտարարված գնման գործընթացի «բավարար» գնահատված բոլոր մասնակիցների ներառյալ «Արմիլիդայնպրոեկտ» ՍՊԸ-ի և «Մոնտաժտրանսշին» ՓԲԸ-ի հրավերով պահանջվող քաղաքաշինական բնագավառի շինարարություն իրականացնող լիցենզիաները:

Հիմք ընդունելով լիցենզիաների կասեցման փաստը՝ «բավարար» գնահատված մասնակիցներից ոչ մեկի հետ հնարավոր չէ կնքել պետական գնման պայմանագիր:

Համաձայն «Գնումների մասին» ՀՀ օրենքի 35-րդ հոդվածի 1-ին կետի 4-րդ ենթակետի, /պայմանագիր չի կնքվում/ ՀՀ Արագածոտնի մարզի գ. Մաստարայի միջն. դպրոցի երկրորդ մասնաշենքի հիմնանորոգման աշխատանքների գնման նպատակով հայտարարված «ՔՆՔԾԻԳ-ԲԸԱՇՁԲ-13/3» ծածկագրով բաց ընթացակարգը հայտարարվել է չկայացած:

3. ԳԲԽ-19/13 բողոքի վերաբերյալ «Գնումների աջակցման կենտրոն» ՊՈԱԿ-ի դիրքորոշումը.

«Գնումների աջակցման կենտրոն» ՊՈԱԿ-ը հանձնաժողովին ներկայացրել է իր եզրակացությունը և առաջարկել է «Արմիլիդայնպրոեկտ» ՍՊԸ-ի կողմից 25.03.2013թ. «Գնումների աջակցման կենտրոն» ՊՈԱԿ-ին ներկայացված բողոքը բավարարել՝ դադարեցնել ՀՀ քաղաքաշինության նախարարության «Քաղաքաշինական ծրագրերի իրականացման գրասենյակ» ՊՀ-ի կողմից կազմակերպված «ՔՆՔԾԻԳ-ԲԸԱՇՁԲ-13/3» ծածկագրով բաց ընթացակարգի գնահատող հանձնաժողովի կողմից «Արմիլիդայնպրոեկտ» ՍՊԸ-ի և «Մոնտաժտրանսշին» ՓԲԸ-ի հայտը մերժելու մասին որոշումը:

4. ԳԲԽ-19/13 բողոքի վերաբերյալ էական նշանակություն ունեցող փաստերը, ԳԲԽ-19/13 բողոքը քննող հանձնաժողովի հիմնավորումները և եզրահանգումները.

Հանձնաժողովն ուսումնասիրել է «Արմիլիդայնպրոեկտ» ՍՊԸ-ի (այսուհետև՝ նաև Ընկերություն) կողմից 25.03.2013թ. ներկայացված բողոքը, «ՔՆՔԾԻԳ-ԲԸԱՇՁԲ-13/3» ծածկագրով էլեկտրոնային ձևով բաց ընթացակարգի հրավերը (այսուհետև՝ նաև Հրավեր), «ՔՆՔԾԻԳ-ԲԸԱՇՁԲ-13/3» ծածկագրով էլեկտրոնային ձևով բաց ընթացակարգի գնահատող հանձնաժողովի (այսուհետև՝ նաև գնահատող հանձնաժողով) կողմից «Արմիլիդայնպրոեկտ» ՍՊԸ-ին ուղարկված էլեկտրոնային ծանուցումները, «ՔՆՔԾԻԳ-ԲԸԱՇՁԲ-13/3» ծածկագրով էլեկտրոնային ձևով բաց ընթացակարգին մասնակցելու նպատակով «Մոնտաժտրանսշին» ՓԲԸ-ի կողմից հայտով որպես ֆինանսական միջոցների առկայությունը հավաստող փաստաթուղթ ներկայացված հայտարարությունը և նույն հայտարարությանը կից «Մոնտաժտրանսշին» ՓԲԸ-ի և «Յունիբանկ» ՓԲԸ-ի միջև 25.01.2013թ. կնքված N 004-038/ԲՕ վարկային պայմանագիրը, «Յունիբանկ» ՓԲԸ-ի 21.03.2013թ. N 231 գրությունը, ՀՀ քաղաքաշինության նախարարության «Քաղաքաշինական ծրագրերի իրականացման գրասենյակ» ՊՀ-ի (այսուհետև՝ նաև Պատվիրատու) 13.04.2013թ. Կենտրոնին հասցեագրված N ՀՍ/1-321-13 գրությունը, «Գնումների աջակցման կենտրոն» ՊՈԱԿ-ի եզրակացությունը:

ՀՀ քաղաքաշինության նախարարության «Քաղաքաշինական ծրագրերի իրականացման գրասենյակ» ՊՀ-ն ՀՀ Արագածոտնի մարզի գ. Մաստարայի միջնակարգ դպրոցի (երկրորդ մասնաշենք) հիմնանորոգման աշխատանքների ձեռքբերման նպատակով կազմակերպել է «ՔՆՔԾԻԳ-ԲԸԱՇՁԲ-13/3» ծածկագրով էլեկտրոնային ձևով բաց ընթացակարգ (այսուհետև՝ նաև Ընթացակարգ):

Ընթացակարգին մասնակցելու նպատակով համատեղ գործունեության կարգով (կոնսորցիումով) հայտ են ներկայացրել «Արմիլիդայնպրոեկտ» ՍՊԸ-ն և «Մոնտաժտրանսշին» ՓԲԸ-ն:

Բողոքաբեր ընկերությունը Կենտրոնին ներկայացված բողոքով հայտնել է, որ «Արմիլիդայնպրոեկտ» ՍՊԸ-ն և «Մոնտաժտրանսշին» ՓԲԸ-ն կոնսորցիումով մասնակցել են ՀՀ քաղաքաշինության նախարարության «Քաղաքաշինական ծրագրերի իրականացման գրասենյակ» պետական հիմնարկի կողմից կազմակերպված «ՔՆՔԾԻԳ-ԲԸԱՇՁԲ-13/3» ծածկագրով բաց ընթացակարգին, որի արդյունքում կազմակերպությունները ճանաչվել են ընթացակարգի 1-ին տեղն զբաղեցնող մասնակից և հրավերով սահմանված ժամկետներում

ընկերություններին առաջարկվել է 5 օրացուցային օրվա ընթացքում ներկայացնել որակավորման չափանիշներին համապատասխանությունը հիմնավորող փաստաթղթերը: Ընկերությունների կողմից սահմանված ժամկետներում ներկայացվել են պահանջվող փաստաթղթերը, որի արդյունքում պարզվել է, որ որոշ փաստաթղթերում առկա են անհամապատասխանություններ և գնահատող հանձնաժողովն առաջարկել է 3 աշխատանքային օրվա ընթացքում շտկել ներկայացված որակավորման փաստաթղթերում տեղ գտած անհամապատասխանությունները: Ընկերությունների կողմից հաջորդ օրը շտկվել և գնահատող հանձնաժողովին են ուղարկվել նշված փաստաթղթերը, որից հետո գնահատող հանձնաժողովն անհիմն կերպով մերժել է Կազմակերպությունների հայտը՝ պատճառաբանելով, որ բացակայում էին «Մոնտաժտրանսշին» ՓԲԸ-ի ֆինանսական միջոցների մասին հայտարարությանը /հրավերի հավելված 2.3/ կցվող փաստաթղթերը /վարկային գծի տրամադրման մասին բանկի կամ վարկային կազմակերպության հետ կնքված պայմանագիր կամ բանկի, վարկային կազմակերպության կամ ապահովագրական ընկերության կողմից տրված երաշխիքը/, մինչդեռ «Մոնտաժտրանսշին» ՓԲԸ-ի կողմից ներկայացվել է նշված փաստաթուղթը: Սակայն «Արմիլիդայնպրոեկտ» ՍՊԸ-ն բանավոր կերպով տեղեկացել է, որ գնահատող հանձնաժողովը հայտը մերժել է այն պատճառով, որ ներկայացված վարկային պայմանագիրը հանձնաժողովի կողմից չի համարվել պահանջվող վարկային գծի պայմանագիր:

«Քաղաքաշինական ծրագրերի իրականացման գրասենյակ» ՊՀ-ն Կենտրոնին հասցեագրված 13.04.2013թ. N ՀՍ/1-321-13 գրությամբ հայտնել է, որ գնահատող հանձնաժողովի կողմից «Մոնտաժտրանսշին» ՓԲԸ-ի և «Արմիլիդայնպրոեկտ» ՍՊԸ-ի ներկայացված փաստաթղթերի գնահատման արդյունքում արձանագրվել են որոշակի անհամապատասխանություններ, ինչի մասին Պատվիրատուն «Արմիլիդայնպրոեկտ» ՍՊԸ-ին և «Մոնտաժտրանսշին» ՓԲԸ-ին ներկայացրել է ծանուցում՝ հայտնելով, որ «ՔՆՔԾԻԳ-ԲԸԱՇՁԲ-13/3» գնման գործընթացի հրավերով սահմանված որակավորման պահանջներին համապատասխանելու մասին ներկայացված փաստաթղթերում գնման գործընթացի հրավերով սահմանված պահանջների նկատմամբ առկա են անհամապատասխանություններ, մասնավորապես՝

1. Ամբողջական չեն նախկինում կատարած պայմանագրերի և աշխատանքների հանձնման-ընդունման արձանագրությունների փաստաթղթերի փաթեթը

2. Բացակայում են «Մոնտաժտրանսշին» ՓԲԸ-ի ֆինանսական միջոցների առկայությունը հավաստող փաստաթղթերը, ինչպես նաև կնքվելիք պայմանագրի

կատարման համար անհրաժեշտ աշխատանքային ռեսուրսների մասին հայտարարությունը՝ կցվող փաստաթղթերով, համատեղ գործունեության կարգով (կոնսորցիումով) մասնակիցներից յուրաքանչյուրի ստանձնած պարտավորությունների չափի մասին փաստաթղթերը:

3. Ներկայացված ոչ բոլոր փաստաթղթերն են ստորագրված և կնքված համատեղ գործունեության կարգով (կոնսորցիումով) հանդես եկող մասնակիցների կողմից:

Հիմք ընդունելով «Գնումների գործընթացի կազմակերպման մասին» կարգի 75-րդ կետի պահանջը նշված ծանուցմամբ Պատվիրատուն բողոքաբեր ընկերությանն առաջարկել է «Արմիլդիգայնպրոեկտ» ՍՊԸ-ին և «Մոնտաժտրանսշին» ՓԲԸ-ին նույն ծանուցումն ստանալուց երեք աշխատանքային օրվա ընթացքում շտկել վերոհիշյալ անհամապատասխանությունները:

Կենտրոնին հասցեագրված գրությամբ Պատվիրատուն հայտնել է նաև, որ գնահատող հանձնաժողովին ներկայացված փաստաթղթերով չեն ամբողջացվել նախկինում կատարած պայմանագրերի և աշխատանքների հանձնման-ընդունման արձանագրությունների փաստաթղթերի փաթեթը և «Մոնտաժտրանսշին» ՓԲԸ-ի ֆինանսական միջոցների առկայությունը հավաստող փաստաթուղթ ներկայացվել է «Յունիբանկ» ՓԲԸ-ի և «Մոնտաժտրանսշին» ՓԲԸ-ի միջև կնքված վարկային պայմանագիր, ինչը գնահատող հանձնաժողովի կողմից չի ընդունվել որպես հրավերով պահանջվող վարկային գծի մասին պայմանագիր:

«Գնումների մասին» ՀՀ օրենքի (այսուհետև՝ նաև Օրենք) 5-րդ հոդվածի 3-րդ մասի 4-րդ կետի համաձայն՝ Մասնակիցը պետք է ունենա պայմանագրով նախատեսված պարտավորությունների կատարման համար հրավերով պահանջվող ֆինանսական միջոցներ:

«Գնումների մասին» ՀՀ օրենքի 31-րդ հոդվածի՝

- 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

- 5-րդ մասի համաձայն՝ առաջին և հաջորդաբար տեղերը զբաղեցրած մասնակիցներին որոշելուց հետո՝ հրավերով սահմանված ժամկետում՝

- 1) առաջին տեղը զբաղեցրած մասնակիցը հանձնաժողովին է ներկայացնում իր՝ գնումներին մասնակցելու իրավունքը և հրավերով նախատեսված որակավորման

չափանիշներին համապատասխանությունը հիմնավորող՝ հրավերով նախատեսված փաստաթղթերը (տեղեկությունները)։

2) հանձնաժողովը գնահատում է նույն մասի 1-ին կետի համաձայն ներկայացված փաստաթղթերի (տեղեկությունների) համապատասխանությունը հրավերով սահմանված պահանջներին, և հրավերով սահմանված դեպքերում ու կարգով գնահատում է տվյալ մասնակցի գնային և ոչ գնային (տեխնիկական) առաջարկի հիմնավորվածությունը։

«Կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի (այսուհետև՝ նաև Կարգ) 83-րդ կետի 1-ին ենթակետի համաձայն՝ Մասնակիցների՝ Օրենքի 5-րդ հոդվածի 3-րդ մասի 4-րդ կետով նախատեսված՝ «Ֆինանսական միջոցներ» չափանիշը գնահատվում է հետևյալ կարգով՝

1. հրավերով պահանջվում է, որ առաջին տեղն զբաղեցրած մասնակիցը պետք է որակավորման չափանիշները հիմնավորող փաստաթղթերով ներկայացնի վարկային գծի տրամադրման մասին բանկի կամ վարկային կազմակերպության հետ կնքված պայմանագիր կամ բանկի, վարկային կազմակերպության կամ ապահովագրական ընկերության կողմից տրված երաշխիք։ Ընդ որում, վարկային գծի կամ երաշխիքի չափը չպետք է պակաս լինի մասնակցի գնային առաջարկի տասը տոկոսից, իսկ գործողության ժամկետը չպետք է պակաս լինի պայմանագրի ամբողջ ծավալով կատարման վերջնաժամկետից՝ բացառությամբ պայմանագրով սահմանված երաշխիքային ժամկետի։

2. մասնակցի որակավորումը գնահատվում է բավարար, եթե վերջինս ապահովում է նույն կետով նախատեսված պահանջները։

Կարգի 75-րդ կետի համաձայն՝ որակավորումը հիմնավորող փաստաթղթերի գնահատման արդյունքում գնահատող հանձնաժողովի կողմից անհամապատասխանություն արձանագրվելու (հայտնաբերվելու) դեպքում՝ գնումները համակարգողը երեք աշխատանքային օրվա ընթացքում դրա մասին տեղեկացնում է մասնակցին՝ առաջարկելով երեք աշխատանքային օրվա ընթացքում շտկել անհամապատասխանությունը։ Արձանագրված անհամապատասխանությունը սահմանված ժամկետում՝

1. շտկվելու դեպքում մասնակցի հայտը գնահատվում է բավարար,
2. չշտկվելու դեպքում, գնահատող հանձնաժողովի որոշմամբ, տվյալ մասնակցի հայտը մերժվում է։

«Մոնտաժորանսշին» ՓԲԸ-ն «ՔՆՔԾԻԳ-ԲԸԱՇՁԲ-13/3» ծածկագրով բաց ընթացակարգին մասնակցելու նպատակով համատեղ գործունեության կարգով ներկայացրած հայտով՝ N 2.3 հավելվածով ներկայացրել է ֆինանսական միջոցների մասին

տեղեկանք, որով հայտնել է, որ ընկերության վարկային գծի չափը կազմում է 7.500.000 ՀՀ դրամ:

Պատվիրատուն դիմել է «Արմիլիդայնպրոտեկտ» ՍՊԸ-ին՝ հայտնելով, որ բացակայում է «Մոնտաժտրանսշին» ՓԲԸ-ի ֆինանսական միջոցների առկայությունը հավաստող փաստաթուղթը և առաջարկել Կարգի 75-րդ կետին համապատասխան շտկել նշված անհամապատասխանությունը:

«Մոնտաժտրանսշին» ՓԲԸ-ն, սահմանված ժամկետում Պատվիրատուին է ներկայացրել «Մոնտաժտրանսշին» ՓԲԸ-ի և «Յունիբանկ» ՓԲԸ-ի միջև 25.01.2013թ. կնքված N 004-038/ՔՕ վարկային պայմանագիրը:

«Մոնտաժտրանսշին» ՓԲԸ-ի և «Յունիբանկ» ՓԲԸ-ի միջև 25.01.2013թ. կնքված N 004-038/ՔՕ վարկային պայմանագրի 1.1 կետի համաձայն բանկը վարկառուին է տրամադրում 7.500.000 (յոթ միլիոն հինգ հարյուր հազար) ՀՀ դրամ գումարի օվերդրաֆտ (վարկ), իսկ պայմանագրի 1.2 կետի համաձայն ժամկետայնությունը կազմել է 12 ամիս, ընդ որում մինչև 22.10.2013թ. առանց վարկի գումարի մարման: Պայմանագրի 1.4 կետի համաձայն վարկը (օվերդրաֆտը) տրամադրվում է ընթացիկ վճարումների համար:

Միաժամանակ բողոքաբեր կազմակերպության կողմից ներկայացվել է «Յունիբանկ» ՓԲԸ-ի կողմից 21.03.2013թ. տրված N 231 գրությունը, որով «Յունիբանկ» ՓԲԸ-ն հայտնել և հավաստել է, որ «Յունիբանկ» ՓԲԸ-ի և «Մոնտաժտրանսշին» ՓԲԸ-ի միջև 25.01.2013թ. կնքված թիվ 004-038/ՔՕ վարկային պայմանագրով տրամադրված 7.500.000 ՀՀ դրամ գումարի օվերդրաֆտը համարվում է վարկային գիծ:

Այսինքն, «Մոնտաժտրանսշին» ՓԲԸ-ի կողմից «ՔՆՔԾԻԳ-ԲԸԱՇՁԲ-13/3» ծածկագրով բաց ընթացակարգին մասնակցելու նպատակով N 2.3 հավելվածով ներկայացված պայմանագիրը հանդիսանում է վարկային գծի պայմանագիր և համապատասխանում է Կարգի 83-րդ կետի 1-ին ենթակետով սահմանված պահանջներին: Գտնում ենք, որ Հանձնաժողովը՝ նկատի ունենալով, որ ներկայացված վարկային պայմանագիրը չի համապատասխանում Կարգի 83-րդ կետով սահմանված պահանջներին և արձանագրելով, որ բացակայում է ընկերության ֆինանսական միջոցները հիմնավորող փաստաթուղթը, խախտել է Կարգի 75-րդ կետի 1-ին ենթակետով և 83-րդ կետի 2-րդ ենթակետով սահմանված պահանջները:

Ինչ վերաբերում է Պատվիրատուի այն հիմնավորմանը, որ գնահատող հանձնաժողովին ներկայացված փաստաթղթերով չեն ամբողջացվել նախկինում կատարած պայմանագրերի և աշխատանքների հանձնման-ընդունման արձանագրությունների

փաստաթղթերի փաթեթը, անհիմն է, քանի որ արձանագրված անհամապատասխանությունները Կարգի 75-րդ կետին համապատասխան շտկվելուց հետո Պատվիրատուի կողմից բողոքաբեր ընկերությանն ուղղարկված էլեկտրոնային ծանուցման մեջ որպես անհամապատասխանություն նշված է միայն ֆինանսական միջոցների մասին հայտարարությանը կցվող փաստաթղթերի՝ տվյալ դեպքում վարկային գծի տրամադրման մասին բանկի հետ կնքված պայմանագրի, բացակայությունը, իսկ նախկինում կատարած պայմանագրերի և աշխատանքների հանձնման-ընդունման արձանագրությունների փաստաթղթերի փաթեթն ամբողջացված չլինելու մասին ծանուցման մեջ որևէ հիշատակում առկա չէ: Բացի այդ, Պատվիրատուի կողմից չի ներկայացվել որևէ ապացույց, «Արմիլիդիզայնպրոեկտ» ՍՊԸ-ի և «Մոնտաժտրանսշին» ՓԲԸ-ի կողմից հայտով ներկայացված նախկինում կատարած պայմանագրերի և աշխատանքների հանձնման-ընդունման արձանագրությունների փաստաթղթերի փաթեթում առկա անհամապատասխանությունների վերաբերյալ:

Պատվիրատուն Կենտրոնին հայտնել է, որ հետագայում ՀՀ քաղաքաշինության նախարարի 27.03.2013թ. N 95 հրամանով կասեցվել են «ՔՆՔԾԻԳ-ԲԸԱՇՁԲ-13/3» ծածկագրով հայտարարված գնման գործընթացի «բավարար» գնահատված բոլոր մասնակիցների ներառյալ «Արմիլիդիզայնպրոեկտ» ՍՊԸ-ի և «Մոնտաժտրանսշին» ՓԲԸ-ի հրավերով պահանջվող քաղաքաշինական բնագավառի շինարարություն իրականացնող լիցենզիաները և հիմք ընդունելով լիցենզիաների կասեցման փաստը՝ «բավարար» գնահատված մասնակիցներից ոչ մեկի հետ հնարավոր չէ կնքել պետական գնման պայմանագիր:

Պատվիրատուն հայտնել է նաև, որ համաձայն «Գնումների մասին» ՀՀ օրենքի 35-րդ հոդվածի 1-ին կետի 4-րդ ենթակետի, ՀՀ Արագածոտնի մարզի գ. Մաստարայի միջն. դպրոցի երկրորդ մասնաշենքի հիմնանորոգման աշխատանքների գնման նպատակով հայտարարված «ՔՆՔԾԻԳ-ԲԸԱՇՁԲ-13/3» ծածկագրով բաց ընթացակարգը հայտարարվել է չկայացած:

Գնումների բողոքարկման խորհուրդը գտնում է, որ Պատվիրատուի կողմից ներկայացված «ՔՆՔԾԻԳ-ԲԸԱՇՁԲ-13/3» ծածկագրով բաց ընթացակարգը չկայացած հայտարարելու հիմքում ընկած հիմնավորումները վերաբերելի չեն ներկայացված բողոքի առարկային, հետևաբար ենթակա չեն քննարկման:

Վերոգրյալի հիման վրա և հիմք ընդունելով «Գնումների մասին» ՀՀ օրենքի 48-րդ հոդվածի 6-րդ մասի 2-րդ կետը գնումների բողոքարկման խորհուրդը

Ո Ր Ո Շ Ե Ց

1. «Արմիլիդայնպրոտեկտ» ՍՊԸ-ի կողմից 25.03.2013թ. ներկայացված բողոքը բավարարել:


2. Դադարեցնել ՀՀ քաղաքաշինության նախարարության «Քաղաքաշինական ծրագրերի իրականացման գրասենյակ» ՊՀ-ի կողմից կազմակերպված «ՔՆՔԾԻԳ-ԲԸԱՇՁԲ-13/3» ծածկագրով բաց ընթացակարգի գնահատող հանձնաժողովի կողմից «Արմիլիդայնպրոտեկտ» ՍՊԸ-ի և «Մոնտաժտրանսշին» ՓԲԸ-ի հայտը մերժելու մասին որոշումը:

Գնումների բողոքարկման խորհրդի որոշումն իրավապարտադիր է:

Գնումների բողոքարկման խորհրդի կայացրած որոշումը կարող է բողոքարկվել դատական կարգով:

Բողոքը քննող հանձնաժողովի՝

Նախագահ՝ Ազգանուշ Ֆրանգյան



Անդամ՝ Ռուդիկ Օհանյան

